

內經運氣病釋

內經運氣病釋自序

素問自天元紀以下七篇皆言五運六氣天時民病同異生化之原正反逆從之治而先於六節藏象篇發其端凡在天人氣交之病非此不能知也夫治病不外乎五行五行又不外乎陰陽而言五行者不知言合化之五行言陰陽者又不知言過不及之陰陽則陰陽非此陰陽五行未非此五行矣況并陰陽五行之不言焉知所謂氣交者哉爰就內經之言運氣者首列經文民病於此卽以氣交之旨櫟括而疏通之并以宋人陳無擇三因十六方國朝江陰繆問芳遠氏十六方解附焉或有疑而詰之者曰人病之來也何有常而子

獨以運氣爲言豈能於人身之病定相合耶然而余之意本
不爲是也經曰善言天者必應於人善言古者必驗於今人
身一小天地天地之生長收藏備於人身人身之盛衰虛實
同於天地論司天固足以明天道卽不論司天而人在氣交
之中卽因氣交而爲病於古如是於今如是卽仲景論傷寒
所以撰用素問者亦無不如是蓋非是則不知病之所以爲
治并不知人之所以爲病乃自有馬元素程德齋之徒素隱
行怪流入異端而人不解內經大義遂繼之以不信於是而
凡六經之病之生於氣交者無人能道曷怪其謂內經運氣
若無與於六經病而且謂仲景之論亦無與於內經運氣乎

故莫若揭此七篇病因治法以求六經病所由來而六經之何由而病病之何由而治既可以內經之言明仲景之法并可以知今人之病無一不出於內經之言此天完紀以下七篇所以不可廢也豈必拘泥乎運氣哉是編也余於同治乙丙歲來往吳淞峯泖間所作藏之篋衍二十年矣今命子潤重加編次將以授諸梓人乃自述其作書之意如此

光緒十年甲申人日陸懋修書於邸舍之雙娛堂

世補齋醫書 內經運氣病釋

目錄

釋一

六節藏象論篇

釋六條

天元紀大論篇

釋五條

五運行大論篇

釋一條

六微旨大論篇

釋二條

氣交變大論篇

釋五十八條

釋二

五常政大論篇

釋四十一條

釋三

六元正紀大論篇

釋一百十條

釋四

至真要大論篇

釋四十九條

釋五

至真要大論篇

釋五十四條

釋六

至真要大論篇

釋七十五條

釋七

至真要大論篇

釋二十條

釋八

氣交篇陳氏十方繆氏十方解

釋十條

釋九

六元篇陳氏六方繆氏六方解

釋六條

附

內經遺篇病釋一卷釋十九條

弁言

吾友陸九芝封公爲鳳石中盾尊人鳳石供奉 內廷君就
養京邸生平以著述自娛而尤邃於醫學嘗語余曰淮南子
有言所以貴扁鵲者知病之所從生也所以貴聖人者知亂
之所由起也此以治病喻已亂與內經之以已亂喻治病者
意別而所以知病所從生則盡在天元紀七篇陰陽五行中
自醫者不讀此七篇而百病之始生皆不知其所自此余內
經病釋所由獨舉此七篇而作也夫病之生也豈能外陰陽
五行之理故卽內經他篇所言病亦無不可由此以推君所
釋雖止七篇直不啻通一部內經而盡釋之厥功偉矣若以

爲此七篇者本言運氣卽謂此書專爲運氣發是豈君志哉
君與余同里間回首少年名場角逐忽忽若前日事今者見
君書之成非第爲病者幸實當爲斯道幸也君書凡三十三
卷皆醫學中不可少之作此尤其蚤歲所獨得而今亦不肯
終秘焉因乞一言以弁篇端時余奉 命視學兩浙行有日
矣倚囊書此願以告後之讀君書者

光緒十年甲申春三月吳劉廷枚

世補齋醫書 內經運氣病釋一

元和陸懋修九芝釋

子 潤庠鳳石參校

六節藏象論篇

天以六六之節以成一歲

此言日六竟而周甲甲六復而終歲三百六十日法也

五日謂之候三候謂之氣六氣謂之時四時謂之歲

此言一歲之日各從五行之氣而主治也

五運相襲而皆治之終暮之日周而復始時立氣布如環無端故曰不知年之所加氣之盛衰虛實不可以爲工矣
此言五運統歲歲立四時時布六氣工不可不知也

太過不及各有所勝求其至也皆歸始春

此言春爲四時之長故凡候氣者皆當始於立春日也
未至而至此爲太過則薄所不勝而乘所勝也至而不至此
爲不及則所勝妄行而所生受病所不勝薄之也

此言民病之所由作也

天食人以五氣地食人以五味

此言治法之所從出也

天元紀大論篇

天有五行御五位以生寒暑燥溼風人有五藏化五氣以生

喜怒哀思憂恐

此言人之五藏本於天之五行也

神在天爲風在地爲木在天爲熱在地爲火在天爲溼在地爲土在天爲燥在地爲金在天爲寒在地爲水

此言在天爲氣卽在地成形上下相召而損益彰也

甲己之歲土運統之乙庚之歲金運統之丙辛之歲水運統之丁壬之歲木運統之戊癸之歲火運統之

此言天之十干以合化而成五運也

子午之歲上見少陰丑未之歲上見太陰寅申之歲上見少陽卯酉之歲上見陽明辰戌之歲上見太陽巳亥之歲上見

厥陰

此言地之十二支以正化對化而成六氣也

厥陰之上風氣主之少陰之上熱氣主之太陰之上溼氣主之少陽之上相火主之陽明之上燥氣主之太陽之上寒氣主之

此言三陰三陽之本是爲六元亦卽所謂天元也

五運行大論篇

氣有餘則制己所勝而侮所不勝其不及則己所不勝侮而乘之己所勝輕而侮之侮反受邪侮而受邪寡於畏也

此言已不務德或所勝妄行有勝必有復復則已反受邪
亦民病所由作而治法所從出也

六微旨大論篇

亢則害承迺制制則生化

此言亢必受制而亦非制不生也病如是治亦如是

言天者求之本言地者求之位言人者求之氣交氣交之中
人之居也氣交之分人氣從之萬物由之

此言民病在於氣交治亦當於氣交求之工不可不知也

氣交變大論篇

歲土太過雨淫流行腎水受邪

此言六甲陽年太宮運土勝水水受克水之子木來復也
民病腹痛清厥意不樂體重煩冤

此土邪傷腎既脾志不舒而心腎亦不交也
甚則肌肉萎足痿不收行善慙腳下痛

此土邪有餘脾經自病發爲痿痺也脾司肌肉者也
飲發中滿食減四支不舉

此土氣太過而水氣不行也飲痰飲也

腹滿溇泄腸鳴

此土盛水衰水氣伏而土氣獨行也

反下甚

此水爲土克而水之子木以風氣復之也木復而土病始則有餘而侮繼則侮反受邪故土自病而利不止

太谿絕者不治

此腎脈也土亢則腎氣絕敦阜之紀有之

歲土不及風迺盛行化氣不令

此言六己陰年少宮運土不及木勝土土之子金來復也

民病飧泄霍亂體重腹痛筋骨繇復肌肉瞶酸善怒

此土不及而木乘之皆脾弱肝強之病也

咸病寒中

此土氣不及寒水無畏水氣獨行而火土並衰也惟己巳己亥年相火在泉民得無病

復則胸脇暴痛下引少腹善太息

此土衰木亢而土之子金以燥氣復之肝膽同病也土不足不生金金失蔭亦來復後凡不及之年皆放此

氣客於脾食少失味

此以土不及則脾不磨穀運化不速也

土不及其病內舍心腹外在肌肉四支

此亦土衰之病卑監之紀有之

歲金不及炎火迺行生氣迺用長氣專勝

此言六乙陰年少商運金不及火勝金金之子水來復也
民病肩背膺重執嚔血便注下

此金受火邪而金之母土亦病也勝金之火爲木火金不
及則木寡於畏所勝妄行也木妄行則土受其克所生受
病也後皆放此

復則頭腦戶痛延及腦頂發熱口瘡甚則心痛

此金衰火亢而金之子水以寒氣復之也寒甚於下則格
陽於上

金不及其病內舍膈脇肩背外在皮毛

此亦金衰之病從革之紀有之

歲金太過燥氣流行肝木受邪

此言六庚陽年太商運金勝木木受克木之子火來復也
民病兩脇下少腹痛目赤痛背瘍耳無所聞體重胸病引背
此金制其所勝之木肝藏既傷而膽府亦病也

甚則喘欬逆氣肩背痛尻陰股膝髀膕足皆病

此金燥過甚肺金自病金不生水而水藏亦病也

反暴痛肱脇不可反側欬逆甚而血溢

此金盛傷肝而木之子火以熱氣復之金反自病也

太衝絕者不治

此肝脈也金亢則肝氣絕堅成之紀有之

歲水太過寒氣流行邪害心火

此言六丙陽年太羽運水勝火火受克火之子土來復也
民病身熱煩心躁悸陰厥上下中寒譫妄心痛

此水盛火衰心藏受邪而神氣內虛也上謂手下謂足
甚則腹大脰腫喘欬癢汗出憎風

此水邪有餘土不能制水氣妄行腎藏自病也於丙辰丙
戌天符之歲尤甚

反腹滿腸鳴漉泄食不化渴而妄冒

此水邪侮火而火之子土以溼氣復之心氣不舒也

神門絕者不治

此心脈也水亢則心氣絕流衍之紀有之

歲水不及溼迺盛行長氣反用

此言六辛陰年少羽運水不及土勝水水之子木來復也
民病腹滿身重濡泄寒瘍流水腰股痛發臃腫股膝不便煩
冤足痿清厥腳下痛甚則跗腫

此土邪傷腎關節不利火鬱而溼亦不行也

寒疾於下甚則腹滿浮腫

此土溼太過陽光不治而大寒在下腎氣傷也於辛丑辛
未寒水在泉之年尤甚

復則面色時變筋骨併辟肉瞤瘛目視眈眈肌肉胗發氣并
鬲中痛於心腹

此水衰土亢而水之子木以風氣復之中土亦病也

水不及其病內含腰脊骨髓外在谿谷踠膝

此亦水衰之病涸流之紀有之

歲木不及燥迺盛行生氣失應

此言六丁陰年少角運木不及金勝木木之子火來復也
民病中清肱脇痛少腹痛

此金邪乘木而肝虛之爲病也

腸鳴澹泄

此清氣在中而木不生火脾之寒也於丁卯丁酉兩年以金遇金尤甚

復則病寒熱瘡瘍癰腫瘰癧瘵瘵而斃

此木衰土亢而木之子火以熱氣復之病在肺之合也

木不及其病內含肱脇外在關節

此亦木衰之病委和之紀有之

歲木太過風氣流行脾土受邪

此言六壬陽年太角運木勝土土受克土之子金來復也

民病飧泄食減體重煩冤腸鳴腹支滿

此木鬱土中脾土受病而水穀不化也

甚則忽忽善怒眩冒顛疾

此木勝肝強厥陰之脈隨督脈會於巔而火上逆也

反脇痛而吐甚

此土爲木克而土之子金以燥氣復之也侮反受邪故肝病而膽亦病

衝陽絕者不治

此胃脈也木亢則胃氣絕發生之耗有之

歲火太過炎暑流行金肺受邪

此言六戊陽年太微運火勝金金受克金之子水來復也民病瘧少氣欬喘血溢血泄注下

此火乘肺金其性急速而肺與大腸又相表裏故逼血妄行於上下也

嗑燥耳聾

此水不上升而少陽之火又行身之側也

中熱肩背熱

此火不下降而燔灼於中且游行於上也

甚則胸中痛脇支滿兩脇痛膺背肩胛間痛兩臂內痛

此皆手心主所行之處火盛故包絡代君受邪而爲病也
身熱骨痛而爲浸淫

此火氣浮越於外熱傷皮絡而爲浸淫瘡也於子午寅申

四戊年上臨君相二火其熱尤甚

反譖妄狂越欬喘息鳴下甚血溢泄不止

此火盛金衰而金之子水以寒氣復之也復則心反受邪故諸病同於首條而加甚

太淵絕者不治

此肺脈也火亢則肺氣絕赫曦之紀有之

歲火不及寒迺盛行長政不用

此言六癸陰年少微運火不及水勝火火之子土來復也民病胸中痛脇支滿兩脇痛膺背肩脾間及兩臂內痛

此火不足則陰邪盛而心氣傷也六戊歲火太過六癸歲

火不及其病相同而一熱一寒卽分於微遲之剛柔
鬱冒矇昧心痛暴痞

此水制其火心氣寒而不舒也

胸腹大脇下與腰背相引而痛甚則屈不能伸髀如別

此火虛而水逆陰寒凝滯陽氣不行也

復則病驚漉腹滿食飲不下寒中腸鳴泄注腹痛

此火衰水亢而火之子土以溼氣復之反侵水藏而水之
爲害益甚病在內也

暴舉痿痺足不任身

此土制其水而水氣不行病在外也

火不及其病內舍膈脇外在經絡

此亦火衰之病伏明之紀有之

凡此氣交所變之病以甲巳乙庚丙辛丁壬戊癸年爲序
者所以明合化之義而中運五音之太少亦因此而見也

世補齋醫書 內經運氣病釋二

元和陸懋修九芝釋

子 潤庠鳳石參校

五常政大論篇

數和之紀其病裏急支滿

此言中運風木之平氣其病宜在筋也肝主筋也凡人當
運氣中應有之證得助得制即可無病病亦不甚故曰平
氣後凡言平氣者放此

升明之紀其病暍癰

此言中運二火之平氣其病宜在脈也血脈生於心也
備化之紀其病否

此言中運溼土之平氣其病宜在肉也脾司肌肉者也

審平之紀其病欬

此言中運燥金之平氣其病宜在皮毛也皮毛肺之合也

靜順之紀其病厥

此言中運寒水之平氣其病宜在骨也腎主骨也

委和之紀其病搖動注恐 又病支廢癱腫瘡瘍

此言中運木不及而從金化金又刑木木生火也

伏明之紀其病昏惑悲忘

此言中運火不及而從水化心陽爲陰所遏也

卑監之紀其病留滿否塞 又病飧泄

此言中運土不及而從木化風又勝之是爲腸風也

從革之紀其病噓欬飢飢

此言中運金不及而從火化肺家每有風熱也

涸流之紀其病痿厥堅下 又病癰閼

此言中運水不及而從土化土邪又歸於腎也

發生之紀其病怒 又病吐利

此言中運木太過而又克土故上吐下瀉也

赫曦之紀其病笑瘡瘍血流狂妄目赤 又病瘡

按瘡字當作瘡

此言中運火太過而又克金故病燥也

敦阜之紀其病腹滿四支不舉

此言中運土太過而本經自病脾主四肢也

堅成之紀其病喘喝胸憑仰息 又其病欬

此言中運金太過而本經自病肺爲諸氣長故病有聲也
流衍之紀其病脹

此言中運水太過而長氣不化火不生土也

厥陰司天風氣下臨脾氣上從

此以巳亥歲半以上風化於天歲半以下火行於地言也
民病體重肌肉萎食減口爽

此風氣臨下土之所畏故脾氣從而病也食減口爽卽損
穀則愈之謂

目轉耳鳴

此言肝膽同見風木之病以上皆天氣所生病也

赤沃下

此火行於地而見尿血爲地氣所生病也

少陽在泉其治苦酸

按此當云酸苦

是年上木則下火風熱交加酸屬木以治其上苦屬火以治其下不兼間味者與少陽司天同也義見後

少陰司天熱氣下臨肺氣上從

此以子午歲半以上熱化於天歲半以下燥行於地言也

民病喘嘔寒熱噤齕衄鼻窒甚則瘡瘍燔灼

此火氣臨下金之所畏故肺氣從之而逆天氣所生病也
脇痛善太息

此燥行於地甲木受傷爲地氣所生病也

陽明在泉其治辛苦甘

按此當云
苦辛甘

是年上火則下金燥熱交結苦屬火以治其上辛屬金以
治其下必兼甘者火金之間味也甘屬土爲火之子爲金
之母故能調和於火金之間

太陰司天溼氣下臨腎氣上從

此以丑未歲半以上溼化於天歲半以下水行於地言也
民病胸中不利陰痿氣大衰

此溼氣臨下水之所畏故腎氣亦從而不用也

反腰腫痛厥逆

此以土王之時腎病尤甚轉搖不便皆天氣所生病也

心下否痛少腹痛

此水行於地心火受制火不生土而時害於食皆地氣所生病也

太陽在泉其治淡鹹

是年上土則下水寒溼內蘊淡屬土卽土之薄味以治其上鹹屬水爲水之正味以治其下水土既平故不兼間味也

少陽司天火氣下臨肺氣上從

此以寅申歲半以上火化於天歲半以下木行於地言也
民病欬噎衄衄鼻窒口瘍寒熱肘腫

此火氣臨下金之所畏故肺氣亦從而上逆與少陰司天
略同皆天氣所生病也

心痛胃脘痛厥逆鬲不通

此風行於地肝木自王爲地氣所生病也

厥陰在泉其治酸苦

按此當云苦酸

是年上火則下木風熱爲災苦屬火以治其上酸屬木以
治其下木火合德故不兼間味

陽明司天燥氣下臨肝氣上從

此以卯酉歲半以上燥化於天歲半以下火行於地言也
民病脇痛目赤掉振鼓慄筋痿不能久立

此燥氣臨下木之所畏故肝氣亦從而上逆也肝竅在目
而主風主筋已所勝者輕而侮之皆天氣所生病也
小便變寒熱如瘡甚則心痛

此熱行於地而病肺心火在陰分鬱而不伸爲地氣所生
病也

少陰在泉其治辛苦甘

是年上金則下火燥熱交侵辛屬金以治其上苦屬火以

治其下甘味義見前

太陽司天寒氣下臨心氣上從

此以辰戌歲半以止寒化於天歲半以下土行於地言也
民病心熱煩噤乾善渴飢噉喜悲數欠善忘甚則心痛

此寒氣臨下火之所畏故心氣從而上逆也水勝爲寒火
鬱爲熱熱氣妄行寒又復之皆天氣所生病也

水飲內積中滿不食皮癢肉苛筋脈不利甚則附腫身後癰
此淫行於地病在肌肉爲地氣所生病也以其人癢痺久
臥故身後上背下髀爲此癰瘡

太陰在泉其治甘鹹

按此當
云鹹甘

是年上水則下土寒溼相合鹹屬水以治其上甘屬土以

治其下

按此六治者前人亦以六氣之化言之然經文明言其治疑當以治法爲言正與後文上取下取內

取外取以求其過者合也

世補醫書 內經運氣病釋三

元和陸懋修九芝釋

子 潤庠鳳石參校

六元正紀大論篇

厥陰司天之政氣化運行後天

此言巳亥十年氣後天時而至也

按經文先後之說皆就正月朔日寅時言之

民熱病行於下風病行於上風燥勝復形於中

此以風甚則燥勝而熱復故勝復更作上下之氣相形而見於中也

初之氣民病寒於右之下

此以燥金加於風木初氣爲地左間卽天右間之下也上

十年太極圖說卷三
年太陽寒水或未退位故寒病復見於此

二之氣民病熱於中

此以寒水加於君火故熱爲寒鬱卽傷寒成溫之候也

三之氣民病泣出耳鳴掉眩

此以三氣卽司天風木用事風火交煽有風必有火也

四之氣民病黃痺而爲胕腫溼暑溼熱相薄爭於左之上

此以少陰暑熱與太陰溼土相爭而爲溼熱之病也本年少陰君火在天之左間

五之氣寒氣及體

此以客溼土主燥金燥溼更勝而爲沈陰之病也

終之氣其病溫厲

此以終氣卽司地相火用事相火者畏火也畏火司令時寒氣熱故病溫厲卽冬溫而民皆病者也

歲宜以辛調上以鹹調下畏火之氣無妄犯之

此言辛從金化以調上之風木鹹從水化以調下之相火然相火易虛易實不比君火之有常調之非易故宜慎也少陰司天之政氣化運行先天

此言子午十年氣先天時而至也

民病欬喘血溢血泄眈眈目赤眚瘍寒厥入胃心痛腰痛腹大噎乾腫上

此以上火下金火熱而金清故熱病見上清病見下也
初之氣民病關節禁固腰腠痛中外瘡瘍

此寒水爲病而以二之氣炎暑將臨故又病熱也

二之氣民病淋目瞑目赤氣鬱於上而熱

此爲木火相生民氣當和而火鬱亦不能不爲病也

三之氣民病氣厥心痛寒熱更作欬喘目赤

此言三氣卽司天君火用事二火交煽故病熱也

四之氣民病寒熱嗌乾黃痺飢飢飲發

此以客主氣皆溼土而又承君相二火之後故病溼熱也

五之氣民病溫

此以陽隨收令惟火沴金時寒氣熱陽邪之勝爲病正多也

終之氣民病腫於上欬喘甚則血溢病生皮膚內舍於脇下連少腹而作寒中

此以終氣卽司地燥金用事金性收故五氣之餘火內格金氣清故本氣之新寒又作也

歲宜鹹以奠之而調其上甚則以苦發之以酸收之而安其下甚則以苦泄之

此以鹹從水化故能調在上之君火金以酸補故能安在下之燥金甚則以苦發之者上熱甚則非用苦之陽不能

發越也以苦泄之者下熱甚則非用苦之陰不能涌泄也
同一苦味而有從陽從陰之別卽有苦寒苦熱之殊余所
以謂藥借病用卽由此悟入耳

太陰司天之政氣化運行後天

此言丑未十年氣後天時而至也

民病寒溼腹滿身腹憤跗腫痞逆寒厥拘急

此以陰凝於上寒積於下故所病皆寒溼也

初之氣民病血溢筋絡拘強關節不利身重筋痠

此以客主氣皆風木而太陰以溼土司天風溼相搏風病
筋而溼病肉血溢爲木火之逆而亦寒溼所鬱也

二之氣民病溫厲盛行遠近咸若

此以客主氣皆君火其氣當和而以溼熱交蒸故作溫厲
三之氣民病身重胕腫胸腹滿

此以三氣卽司天溼土用事而主氣又爲畏火故病溼熱
四之氣民病腠理熱血暴溢癰心腹滿熱臄脹甚則胕腫
此以客火主溼而熱甚於溼故病加甚

五之氣民病皮腠

此以客主氣皆燥金故病及肺金之合同類相從也
終之氣民病關節禁固腰膝痛

此以終氣卽司地寒水用事故病見於太陽所經之路

十和方書卷之三
歲宜以苦燥之溫之甚者發之泄之

此言溼宜於燥寒宜於溫味必用苦者苦從火化正用苦之陽也而及其溼寒既化爲熱又必有以發泄之

少陽司天之政氣化運行先天

此言寅申十年氣先天時而至也

民病寒熱外發瘡瘍內爲泄滿

此火盛於外而寒鬱於中故爲外熱內寒之證也

往復之作民病寒熱泄瀉嘔吐上怫腫色變

此以木盛則陽明受傷甲木之氣陵犯胃土故爲諸病

初之氣溫病迺起其病氣怫於上血溢目赤欬逆頭痛血崩

脇滿膚腠中瘡

按經凡言皮膚瘡瘍者即今人病中斑疹之類

此以君火用事於相火司上之年二火合氣故其病溫也
二之氣民病熱鬱於上欬逆嘔吐瘡發於中胸膈不利頭痛
身熱昏憤膿瘡

此以溼土用事於君火主氣之時故爲溼熱之病也

三之氣民病熱中聾瞶血溢膿瘡欬嘔飢飢渴嚏欠喉痺目
赤善暴死

此以三氣卽司天相火用事客主之火皆熾故熱甚也

四之氣民病滿身重

此以客燥主溼燥勝而脾自病溼勝而脾自病也

五之氣民避寒邪

此以水寒金冷示民當知所避也

終之氣民病關閉不禁心痛陽氣不藏而欬

此以終氣卽司地風木用事以風加寒風爲陽邪而其氣主乎動也

炭宜鹹宜辛宜酸滲之泄之瀆之發之

此言鹹從水化能勝火也辛從金化能平木也酸從木化能順木火之性凡風火之相煽尤賴酸以收之也滲之是利小便泄之是通大便瀆之發之是解肌出汗經所謂潔淨府去菟陳莖開發腠理皆所以致津液而通氣也

陽明司天之政氣化運行後天

此言卯酉十年氣後天時而至也

民病欬嗌塞寒熱發暴振慄癰閼

此皆金燥火熱之病肺與小腸受之也

初之氣民病中熱脹面目浮腫善眠軌衄嚏欠嘔小便黃赤甚則淋

此以客氣溼主氣風風爲陽邪溼爲陰邪風溼相搏脾腎交病也

二之氣厲大至民善暴死

此以客相火主君火似乎二火合德而以臣位君則大逆

也

三之氣民病寒熱

此以三氣卽司天燥金用事以陽盛之時而行大涼之氣故病在皮毛也

四之氣民病暴仆振慄譫妄少氣啞乾引飲及爲心痛癰腫瘡瘍瘧寒之疾骨痿血便

此以四氣之後爲司地君火所主而太陽以寒水臨之水火相逆故心腎同病也

五之氣民氣和

此以風木用事而得司地君火之溫故也

終之氣民病溫

此以終氣卽司地君火用事以溫加寒民氣當平而溫從火化病則多熱也

歲宜以鹹以苦以辛汗之清之散之

此以鹹之從水化者治司地之君火苦之從火化者治司天之燥金辛之從金化者治本氣之不及而火來乘之者於上下求得其平也歲半以下氣過於熱故宜清歲半以上氣過於歛故宜散

太陽司天之政氣化運行先天

此言辰戌十年氣先天時而至也

民病寒溼發肌肉萎足痿不收溺寫血溢

此皆寒溼使然而惟血溢爲水火之鬱寒甚必化熱也

初之氣民適屬溫病適作身熱頭痛嘔吐肌腠瘡瘍

此以上年終氣君火與本年初氣相火爲二火之交重以

主氣風木又爲風火相薄故見諸病

二之氣民病氣鬱中滿

此以清燥之氣固結於中而陽鬱也陽鬱則必傷其陰也

三之氣民病寒反熱中癰疽注下心熱瞋悶不治者死

此以三氣卽司天寒水用事以寒化火故病寒反熱所以

太陽之寒傳入陽明卽成溫也不戢則燎原矣

四之氣民病大熱少氣肌肉萎足痿注下赤白

此爲以客勝主溼土受風木之制而陽明反燥也

五之氣民迺舒

此以歲半之後地氣主之以溼土而得君火之助故也

終之氣民迺慘悽反者孕迺死

此以終氣卽司地太陰用事再加於寒水之位故也

歲宜苦以燥之溫之

此言凡遇溼土寒水之年溼宜燥之寒宜溫之味必用苦者苦從火化治寒以熱正用苦之陽也太陰歲宜與此略同不言發泄者義已見於前也

凡此司天所生之病以巳亥子午丑未寅申卯酉辰戌年爲序者所以明厥少太少陽太之六氣而於巳亥起厥之訣亦可推而知也

壬子 壬午

其病支滿

按經文於六元正紀中惟子午寅申辰戌載有民病餘三紀無之

此以中運太角木太過而剋土也

戊子 戊午

其病上熱血溢

此以中運太徵火太過而傷陰也

甲子 甲午

其病中滿身重

此以中運太宮土太過而脾自病也

庚子 庚午

其病下清

此以中運太商金太過而致燥病也

丙子 丙午 其病寒下

此以中運太羽水太過而見寒病也

壬寅 壬申 其病掉眩支脇驚駭

此以中運太角木太過而肝爲病也

戊寅 戊申 其病上熱鬱血滯血泄心痛

此以中運太徵火太過而心爲病也

甲寅 甲申 其病體重肘腫痞飲

此以中運太宮土太過而脾爲病也

庚寅 庚申 其病肩背胸中

此以中運太商金太過而肺爲病也

丙寅 丙申 其病寒浮腫

此以中運太羽水太過而腎爲病也

壬辰 壬戌 其病眩掉目瞋

此以中運太角木太過而見風病也

戊辰 戊戌 其病熱瘰

此以中運太徵火太過而見熱病也

甲辰 甲戌 其病溼下重

此以中運太宮土太過而見溼病也

庚辰 庚戌 其病燥背脊胸滿

此以中運太商金太過而見燥病也

丙辰 丙戌 其病大寒留於谿谷

此以中運太羽水太過而見寒病也

厥陰所至爲裏急 爲支痛 爲癰戾 爲脇痛嘔泄

此巳亥十年初終六氣之病爲病之常也

按此以春夏秋
冬四時爲言

少陰所至爲瘍疹身熱 爲驚惑惡寒戰慄譫妄 爲悲妄

魴鱉 爲語笑

此子午十年初終六氣之病爲病之常也

太陰所至爲積飲否隔 爲積滿 爲中滿霍亂吐下 爲

重附腫

此丑未十年初終六氣之病爲病之常也

少陽所至爲噦嘔瘡瘍 爲驚躁瞋昧暴病 爲喉痺耳鳴

嘔泄 爲暴注瀉瘧暴死

此寅申十年初終六氣之病爲病之常也

陽明所至爲浮虛 爲飢尻陰股膝髀膕足病 爲鼓脹

爲飢噦

此卯酉十年初終六氣之病爲病之常也

太陽所至爲屈伸不利 爲腰痛 爲寢汗瘥 爲流泄禁

止

按此條寢汗瘥亦當作寢汗瘥

此辰戌十年初終六氣之病爲病之常也

木鬱之發

此言金勝制木而木鬱之待時而發也

民病胃脘當心而痛上支兩脇鬲咽不通飲食不下

此木淫土虛之病也

甚則耳鳴眩轉目不識人善暴僵仆

此風淫而本經自病也

木之發其氣無常

此言其發無常期也風善行而數變故發亦無定經曰木

發無時

木鬱達之

達暢達也木喜條達凡在表者當疏其經在裏者當疏其
藏但使氣得通行皆謂之達

火鬱之發

此言水勝制火而火鬱之待時而發也

民病少氣瘡瘍癰腫脇腹胸背面首四支臍憤臃脹瘍痂嘔
逆

此火淫之上衝於肺胃也

癰癰骨痛節迺有動

此火淫之內淫於筋骨也

注下溫瘧腹中暴痛血溢流注精液迺少

此火溼下上流行經絡受傷而動血耗精也

目赤心熱甚則瞽悶懊憹善暴死

此肝心二經之火溼并行於內而其性急速也

刻終大溫汗濡元府

此卽火欲發之徵也凡一氣主六十日八十七刻半火之發在四氣則三氣刻數將終卽有大溫之候

火之發也其氣四

四之氣爲太陰火鬱之發獨在溼土王時故其氣必兼乎溼也

火鬱發之

發發越也凡火之所居其有結聚歛伏者不宜蔽遏故當因其勢而解散之升揚之也凡病於陽虛陽盛二者之外另有陽爲陰遏之證皆當用升陽散火之法卽此之謂土鬱之發

此言木勝制土而土鬱之待時而發也

民病心腹脹腸鳴而爲數後

此溼行於上中下三焦必治其中而上下始安也

甚則心痛脇腹

此心爲溼乘肝爲溼侮也

嘔吐霍亂

此溼上下行而或嘔或吐或吐利交作病每見於中也

飲發注下胕腫身重

此水飲發而大便暴泄脾傷而肌肉見病皆土發溼邪之證也

土之發也以其四氣

四氣爲土之王時故土之發也以四氣

土鬱奪之

奪直取也土畏滯凡滯在上者可吐滯在下者可瀉而皆不外直取其中以安其上下也

金鬱之發

此言火勝制金而金鬱之待時而發也

民病欬逆嗌乾面塵色惡

此燥氣勝而肺病也

心脇滿引少腹善暴痛不可反側

此金氣勝而傷肝也

金之發也其氣五

五氣爲陽明王時故其發也以五氣

金鬱泄之

泄疏利也金鬱之病爲欬爲閉爲燥爲寒凡解表利氣通便皆謂之泄

水鬱之發

此言土勝制水而水鬱之待時而發也

民病寒客心痛腰膝痛大關節不利屈伸不便

此皆寒水爲病於太陽經行之路也

善厥逆痞堅腹滿

此陰勝而陽氣不伸遂成陽爲陰遏之病也

水之發也其氣二火前後

君火爲二之氣相火爲三之氣君火之後相火之前六十

日之內乃水鬱之所發也水王於冬而發於火令之時陰

乘陽也經曰水隨火

水鬱折之

折抑制也水鬱之病爲寒爲水其性善流凡養肺金實脾土利膀胱壯命火皆謂之折

民病犯寒而不遠寒則寒至寒至則堅否腹滿痛急下利之病生矣

此言應遠寒藥而仍用寒則病卽因寒藥之誤而甚也民病犯熱而不遠熱則熱至熱至則身熱吐下霍亂癰疽瘡瘍瘡鬱注下瞤癰腫脹嘔噦頭項痛骨節變肉痛血溢血泄淋瀝之病生矣

此言應遠熱藥而仍用熱則病卽因熱藥之誤而甚也

大積大聚其可犯也衰其大半而止過者死

此言積聚之病必當攻之使去而正乃得安特攻之不可過甚耳此正教人以宜攻之病不可畏虛而留病也

婦人重身毒之何如有故無殞亦無殞也

此言病苟有當去者雖在有娠之婦亦不可畏虛而留病也